

Raymond Hernandez ta duna su punto di vista encuanto situacion

ORANJESTAD(AAN) -- Parlamentario di MEP, Raymond Hernandez, a duna di conoce na DIARIO cu loke a worde declara na Hulanda ta cu e maneho turistico di e tras añanan di gobernacion Eman a trece cune cu un cantidad exagera di hotel a worde construi cu garantianan barbaro.

Esaki ta un compromiso grandi cu e Gabinete anterior a laga pueblo cune. Segun Hernandez, un riesgo grandi, cu ora un of mas di e hotelnan cu garantia bay malo y pueblo tin cu paga pe.

E pregunta grandi ta: "For di unda ta saca e placa necesario pa un eventual catastrofe?"

Gabinete Eman a duna garantia pa mas cu 500 Millon Florin, pero nan a puntra nan mes for di unda lo saca e placa si algo bay malo?

Segun Hernandez, Gabinete Eman na su aparecer no a para keto ningun rato na esaki. Tampoco no a tene cuenta cu e conseho di IMF pa redobla e cantidad di camber te na 4500 camber. Pero a manda e cantidad te na 8000 camber.

No a para keto cu sector turistico con cu bay ta keda un sector fragil. Peor ainda no a para keto cu pa evita cualkier cobramiento di garantia na nos pueblo, lo mester bin cu infraestructura

adicional.

E expansion di e cantidad di camber aki ta existi no solamente mas trahadornan extranhero, pero mester tin mas facilidad.

Hernandez a mostra cu ningun momento por a tende di Gabinete Eman ta for di unda lo saca e placa necesario pa cumpli cu e infraestructura adicional. Cu tur esaki por bisa cu tabata tin falta di vision di parti di e Gobierno anterior.

Cu otro palabra, e expansion di hotelnan ta trece cune, pa evita un posible desastre, cumplimento di exigencianan infraestructural. Esaki segun Hernandez kiermen e cantidad grandi mas di vivienda pa trahadornan extranhero.

Mas schoolnan y maestronan ora cu e 5000 of mas trahadornan bin cu nan famia. Mas camanan di hospital, mediconan y enfermeronan. Mas Polis y equipo pa Polis. Mas miembronan di Inmigracion pa tanto extranhero cu ta bin traha of bishita Aruba.

Mas produccion di awa y electricidad. Mas servicio di Gobierno p.e. Serlimar. Mas carteranan cu alavez lo bay existi mas mantencion.

Y tur e exigencianan aki ta casta placa. Mester di placa pa por cumpli cu e exigencianan aki. Y e pregunta clave ta,

Gabinete Eman por a bisa for di unda ta saca e Millones necesario?

Tin cu bisa pues cu banda di e compromiso di mas cu 500 Millon Florin cu Gabinete Eman a laga pueblo cune, Gabinete Eman a laga un compromiso infraestructural cu nunca nan no a midi den placa. Un compromiso cu e actual Gobierno a sinta calcula cu ya ta banda di mas cu 400 Millon Florin. Y ainda no ta tur cos ta calcula.

Esaki kiermen cu e maneho descabeya y irresponsable pa cu expansion di hotelnan door di Gabinete Eman a compromete pueblo na e suma astronomico di un 1000 Millon Florin of mas.

Segun Hernandez, simbolicamente por pensa den un balanza. bo tin 500 y pico Millon Florin na garantia. Pa evita e riesgo di e compromiso aki, bo tin cu pone e mesun cantidad di placa pa in-

fraestructura via e otro banda di balanza pa balancea e riesgo grandi di e garantianan duna.

Na momento cu bo no cumpli cu esaki e balanza ta bay for di equilibrio y e por ta desastroso pa Aruba. Awor aki e Gobierno actual, mirando su responsabilidad ta buscando forma pa cumpli cu e exigencianan ey. Si awe e Gobierno actual ta worde cualifica como cu Gobierno limosnero anto ta pasobra Gabinete Eman a hinca pueblo den compromisonan financiero grandi.

Si no tin placa, mester buske di un caminda. Segun Hernandez, critica di AVP sigur ta infunda ora nan bisa cu nan ta contra pa busca placa for di afor.

Na ta e mesun Gabinete di AVP tabata preparando pa bay presta placa na Israel? Banda di cumplimento di e exigencianan infraestructural, pa minimalisa e

riesgo di e garantianan aki, Gabinete Oduber a pone su dilanti pa diversifica economia Arubiano.

Coastal sigur ta un di e pasonan den direccion aki pa asina comparti e riesgonan. Johnson & Johnson tambe tabata un otro paso.

Pero si e noticia di e ultimo dianan aki ta berdad cu e fabrica farmacuetico aki ta bay Curaçao, anto por bisa cu criticanan negativo y destructivo ariba inversionistanan manera Coastal, a hunga un rol cu nos a perde e chens aki.

Esaki tanto AVP como varios medionan di comunicacion a contribui na esaki. E pregunta categorico cu ta bin padilanti ta: "Pakico e actitud destructivo di parti oposicion y cu cual meta?" Esaki pues tabata e punto di bista di Parlamentario di MEP, Raymond Hernandez.

Instituto Pedagogico Arubano ta cuminsa campaña di informacion

ORANJESTAD (AAN) -- E desaroyonan pa e inicio di e Instituto Pedagogico Arubano a yega na e punto cu den e luna aki lo tene varios encuentro pa duna informacion na instancianan di educacion, esnan trahando den educacion y publico en general. E encuentronan aki lo tin como meta, pone esnan envolvi na altura di:

a. Progreso di e proyecto-IPA
b. Duna informacion riba estructura, organizacion y contenido di e Instituto Pedagogico nobo.
c. Lugar di IPA den e constatacion educativo

Durante e encuentronan aki lo duna esnan envolvi oportunidad pa trece nan deseo y proposicionnan dilanti y mira unda den e proyecto tene cuenta cu esakinan. Diamars dia 13 di Maart e promer encuentro di informacion lo wordo teni cu autoridadnan di educacion. Dia 20, 21 y 22 di Maart e scolnan lo ta na turno. Ya e invitacionnan pa e scolnan a wordo manda. E publico en general tambe lo wordo informa via TeleAruba pa medio di 4 programa di infor-

macion.

E programacion na television lo ta manera siguiente:

14 Maart - Entrevista cu Ministro di Enseñanza tocante IPA.
21 Maart - Un panel di colaboradornan di IPA encuanto e estructura nobo di IPA


28 Maart - Un sketck di e profesion di maestro di scol
5 April - Un conversacion franco cu studiantenan-candidato tocante e instituto nobo. E programanan ta cuminsa pa 21:45 y lo dura te 22:30.

E programanan di television a wordo produci en cooperacion cu BUVO y e Mediadienst di Biblioteca Nacional.

E ciclo di informacion ta wordo clausura dia 6 di Mei cu un grandioso "feria di informacion" cu canto baile, video y exposicion.

TELEFONNAN
DI DIARIO

22207-26747-35026



ENSEÑANSA PA EMPLEO

PROGRESO PA UN Y TUR

Oportunidadnan ta ser crea

Abo tuma di bo

Sina y guia bo mes y Aruba

Den progreso y adelanto

GOBIERNO DI ARUBA

ta participa cu e siguiente cursonan lo bai cuminsa.

Hasi uso di e oportunidad aki.....INSCRIBI!!!

CONVERSACION NA SPANJO (Principiante)

Dia di inscripcion: 13 di maart na Vormingscollege Providentia (San Nicolas) pa 7.30 di anochi.

CONVERSACION NA HULANDES (Principiante)

Dia di inscripcion: 13 di maart na Vormingscollege Providentia (San Nicolas) pa 7.30 di anochi.

TOURIST GUIDE

Dia di inscripcion: 13 di maart na Vormingscollege Providentia (San Nicolas) pa 7.30 di anochi.

PIPE-LAY OUT

Dia di inscripcion: 13 di maart na Vormingscollege Providentia (San Nicolas) pa 7.30 di anochi. E curso lo tuma lugar na M.L. Kingschool.

ASSISTENTE DI KOKKI

Dia di inscripcion: 13 di maart na Vormingscollege Providentia (San Nicolas) pa 7.30 di anochi. E curso lo tuma lugar na Caiquetiosschool na Cura Cabai.

Tur e cursonan ariba menciona ta dirigi ariba practica.

Pa mas informacion por jama tel. 46665 of acudi personalmente na oficina di Enseñansa pa Empleo, Torenstraat 11, San Nicolas.

Formulario di inscripcion lo haya ariba e anochi di inscripcion.

Sea asina bon di trece bo CEDULA riba e anochi aki.

E cursonan lo cuminsa dia 2 di april 1990